

四庫全書

史部

# 欽定四庫全書

史部

安南志畧卷十四

詳校官監察御史<sub>臣</sub>查瑩

檢討<sub>臣</sub>德生覆勘

總校官進士<sub>臣</sub>朱鈐

校對官編修<sub>臣</sub>汪鏞

謄錄監生<sub>臣</sub>陳光第

欽定四庫全書

安南志畧卷十

歷代羈臣

元 黎崱 撰

胡剛漢太傅廣四世祖清高有節王莽居攝解衣冠掛  
府門而去亡命交趾隱於屠肆莽敗乃歸鄉里

梁竦字叔敬明帝永平四年坐兄松事先是松以怨望  
作書誹謗竦與弟恭及松家屬俱徙九真歷江湖沅

湘感悼子胥屈原以辜沉身作悼騷賦後詔還本郡  
常登高遠望嘆息言曰丈夫居世生當封侯死當廟  
食如其不然閒居可以養志詩酒足以自娛外郡之  
役徒勞人耳後辟命交至並無所受

闕

忠字心甫桓帝延禧末天下亂棄官客會稽孫策破  
會稽忠浮海南沒交趾

桓曄字文林初平中之亂避地會稽浮海客交越人化  
其節至閭里不爭訟後為凶人所誣死於合浦獄

董俸字君異侯官人士變在交趾嘗病死三日俸與樂九含之食頃顏色漸復半日能起見仙傳

許靖字文休汝南人舉孝廉為掌書郎典選舉避董卓亂往依會稽太守王朗及孫策渡江走交趾以避難士燮厚加禮遇與陳國素微同寓交趾微遺荀彧書云許文休英材偉士自流巖荒域羣士相隨每有急緩常先人後已與九族中外同其饑寒守鉅鹿張翽銜王命使交部乘勢募靖欲與要誓拒不許靖與曹

公書云三江五湖皆為虜廷與袁沛鄧子孝浮涉滄海南至交州歷東甌經行萬里不見漢地輒濟海南與孝德相見知足下忠義奮發整飭元戎西迎大駕即與袁沛徐元賢復共嚴裝荊州水陸無津交部驛使絕斷又張子雲者昔在京城志扶王室今流巖荒城不復參預本朝國之鎮藩足下之外援也翺恨靖不相納搜書投於水劉璋使人招靖入蜀先主用為巴郡廣漢太守終於司徒

劉巴字子初零陵人劉表辟幾次不就曹公辟為掾使  
招納零陵桂陽長沙會先主畧有三郡不復返遂適  
交趾與士燮計謀不合又入蜀諸葛稱之因為尚書  
清儉恭默先主稱號策命皆巴所作

顧譚字子默吳相雍之孫也為尚書以上書疏魯王霸  
由是霸與譚有隙又衛將軍全宗子寄為霸賓友素  
輕邪譚所不納遂坐徙交趾

顧承譚弟也字子直為西部使都尉平山越入為侍中

後與譚俱徙交趾卒

張休字子猷為侍中掾威將軍與顧譚顧承以芍陂論  
事詐偽坐徙交州竟為孫洪所譖詔賜死

劉熙不知何郡人薛綜程秉避亂交趾熙論大義常昭  
熙作釋文八卷物類至繁難復詳究

程秉字德樞汝南人事鄭玄避地交趾與劉熙論大義  
博通五經士變命為長史孫權徵拜太子太傅

俞益期豫章人性剛直不能從俗遠適日南



庾道愍鄆陵人晉司空永玄孫有孝行頗能屬文少孤所生之母漂流交州時道愍尚在襁褓及長求為交州綏寧府佐而去交州尚遠乃自冒險至交州尋求經年日長悲泣嘗入一村日暮驟雨即寄止其家俄有一嫗負薪還道愍心動因訪之乃其母也遂相持號泣見者莫不揮淚道愍仕齊為射聲校尉

張融字思光宋文帝時為封溪令由渤海至交趾海中遇風無懼方詠曰乾魚可自還鄉肉脯何為者哉作

海賦文詞詭譎顧凱之曰此賦實超玄虛但恨不道  
鹽耳融即求筆益曰漉沙構白熬波出素積雪中春  
飛霜暑露

高儉字士廉齊清河王岳之孫隋仁壽中舉文才中甲  
科補戶部吏解政奔高麗遂貶朱鳶主簿以母老不  
得居瘴癘地留解於屯奉養而行會世亂交趾太守  
立和補司法佐時令寧長直以兵侵交趾命儉為行  
軍司馬迎擊破之唐初為中書門下

裴虔通唐辰州刺史貞觀二年通煬帝故人為逆亂雖  
更赦令不可牧民除名流驩州

王福時勃父也高宗時為雍州司戶參軍坐勃事遷交  
趾令勃往交趾省父渡溺水卒

李巢李義琰子也幼豪俊上書陳利害拜監察御史以  
忤旨貶龍編主簿

李友益義府族也附杜正倫同撫義府釁義府使人告正  
倫友益交通罔上有異計高宗惡之流驩州

沈佺期字雲卿相州人累遷給事中考功受財劾未究會張易之敗遂流驩州後歷中書舍人

韓思彥字英遠南陽人爲監察御史政績嘉美太白書見勸帝修德以答天譴帝責李義府曰八品官能言得失而卿冒沒富貴者何義府與諸武諧思彥遂免去上元中復召見思彥久去朝儀矩梗野拜忘蹈舞李敬玄奏徙朱鳶丞卒

盧藏用字子潛幽州人舉進士不第與兄游志於吳蜀

間武后用為黃門侍郎坐附太平公主玄宗欲斬之  
意解乃流新州或告謀反推無狀又流驩州會交州  
反藏用扞禦有勞進黔州長史

宗晉卿武后從弟子兄楚客為戶部侍郎晉卿典羽林  
兵坐楚客營第僭侈過度流峯州

李乾祐為邢魏二州刺史嘗為書與所善吏刺取朝廷  
事迷隱其詞為吏所賣褚遂良白發於朝坐流驩州  
嚴善思則天時監察御史公直敢言垂拱以後任用酷

吏誅宗室殺大臣時密告者不可勝數太后亦厭其煩命善思按治伏罪者八百餘人羅織之黨為之不振乃相與陷善思坐流驩州

竇參德宗時為相外惡李巽出為常州史及參貶郴州節度使劉士寧遺參絹五十巽奏參交結藩鎮上怒欲殺之陸贄力救乃貶驩州司馬尋賜死

李仁鈞礎父也唐貞元中太傅隴西公董晉平津州仁鈞為侍御史管幹鹽鐵隴西公薨軍亂軍司馬從事

皆被殺仁鈞亦被讒貶為日南民

裴夷直字禮卿為中書舍人武宗即位夷直視冊牒不肯僉書出為杭州刺史又斥驩州司戶參軍宣宗時

召為常侍

楊收字藏之南詔蠻自大邕外掠交趾調華人往來屯涉瘴氣死者十七賊勢益強收議豫章募萬人置鎮南軍以拒蠻又泛舟餉南軍上嘉之進尚書僕射懿

宗時為相初尚書右丞裴坦子娶收女資送甚盛器

用飾以犀玉坦怒曰破我家矣立命壞之而收竟以賄敗咸通十一年流驩州尋賜死

陳蟠叟為至德令見懿宗怠荒不視庶政委任路巖奢靡頗通賂遺蟠叟上言請破邊咸一家可贍軍三年上問咸為誰對曰路巖親吏上怒流愛州

劉瞻字幾之桂陽人罷相為荆南節度使咸通十一年同昌公主薨詔捕留官二十餘人全家繫獄瞻與兆尹溫璋力諫言陛下狗愛女囚平民懿宗怒貶瞻為



驩州司戶璋為驩州司馬

陳仲微字致廣瑞州人宋理宗嘉熙戊戌從弟咸淳間  
為朝士嘗論賈似道以是連斥外任轉徙嶺南大元  
至元丙子官軍入執幼主舉國歸附二王南奔仲微  
徙瓊州入見至廣州擢為吏部尚書使召某丞相陳  
宜中宋亡仲微入安南陳聖王尤加禮遇嘗作詩云  
死為越國歸鄉鬼生作南朝拒諫臣數年卒葬於安  
南後安南國弟陳璿坐罪陰遣仲微子陳文孫詣北

乞師伐安南甲申冬大兵南討鎮南王權授陳文孫  
為千戶引導聖王怒斧仲微之棺

曾淵子字廣徵撫州人宋理宗時由侍從出知隆興兼  
安撫召拜臨安府尹就參政府乙亥春以臺端貶雷  
州至元丙子大兵入杭宋幼主降二王浮海至廣州  
淵子來見授廣西宣慰使兼知雷州戊寅春拜侍讀  
加金紫光祿大夫益王鹿厓山之敗參政陸秀夫抱  
廣王投於海淵子赴水為其下所援不死乃寄身蘇

劉義舟中馬旺等殺劉義以淵子奔安南陳聖王禮  
遇之至元甲申冬大兵入安南率衆歸服後不知所  
終

蘇景由宋安撫劉義子也至元丙子官兵入臨安二王  
南奔其父為廣東西策應大使加少保厓山之敗廣  
王葬魚腹矣馬旺等殺劉義共推可文傑為長以劉  
義妻屬焉時景由才十歲文傑即領衆歸安南景由  
以父冤白陳聖王王令檢法官丁拱垣推問文傑厚

賂之拱垣曰是未附我時事不必詰問至元甲申冬  
官兵入安南文傑舉衆降景由復以其事訴鎮南王  
王憫之令人問得失斬文傑景由從師還北遣歸故  
里

安南志畧卷十

欽定四庫全書

安南志畧卷十一

元 黎崱 撰

趙氏世家

趙佗真定人秦時為龍川令

在南海  
循州

秦初并天下畧取越

地至桂林南海象郡以謫民與越雜處南海尉任囂病  
疽死乃以佗行南海尉事秦既滅佗即擊桂林象郡自  
立為王漢高帝已定天下為中國勞苦釋佗罪弗誅十

一年遣陸賈立佗為南粵王高后禁關市鐵器於是佗  
為尊號南越武帝發兵攻長沙以財物賂遺閩越西甌  
駱役屬焉東西萬里乘黃屋左纛稱制與中國侔文帝  
元年為佗親冢置守邑歲時奉祀召其昆弟尊官厚賜  
寵之乃下令中國曰吾聞兩雄不並立兩賢不並存漢  
皇帝賢天子也今去黃屋左纛文帝大悅景帝時稱臣  
使人朝請然其居國僭號如故其使天子稱朝命如諸  
侯建元四年佗薨孫胡嗣立

爾時漢興七十  
年佗蓋百歲矣

胡立閩越擊南越胡不敢擅興兵使人上書漢武帝為  
興師討閩越胡感德遣太子嬰齊入宿衛方日夜裝  
入見其大臣諫曰先王昔言事天子期無失禮不可  
入見入見則不得歸亡國之勢也稱病竟不入見後  
十年胡實病甚嬰齊請歸胡薨謚為文王

嬰齊立即藏先帝璽

李邕云藏其借號璽

初嬰齊入宿衛在長安

取邯鄲嫪氏女生子興及嗣位上書請立嫪氏為后  
興為嗣漢數使人諷諭嬰齊固稱疾遂不入見遣子

次公入侍嬰齊薨謚為明王

興立其母為太后太后未為嬰齊姬時常與灞陵安國少季通元鼎四年國人知之不附太后太后恐亂起欲倚漢威數勸王及幸臣求內屬上書請比諸侯三歲一朝天子許之王太后飭治行裝重齋以入朝其相呂嘉諫止王不聽嘉有叛心數稱疾不見漢使者太后怒欲謀誅嘉乃會宮中酒行太后謂嘉曰南越內屬國之利也而相苦不便何也漢使者狐疑相視莫敢



發嘉見耳目非是即起而出太后怒欲鉞嘉以矛鉞

七

凶反  
撞也

王止太后嘉出稱疾數日不見王遂舉兵反攻

殺王太后及漢使者而立明王庶子術陽侯建德

建德立元鼎五年武帝遣伏波將軍路博德帥十萬師

討之明年攻敗越人遣將擒建德呂嘉於海乃滅其

國置九郡設太守自此始

趙氏五世九  
十三年亡

附宋諫議朱之才南越行

之才字師美洛西人  
崇寧間坐直為四水

令見中  
州集

南越太后邯鄲女皓齒明眸照蠻土珊瑚為帳象  
作牀錦繖高張擊銅鼓太液池內紅芙蓉自憐謫  
在蠻烟中灞陵故人杳無耗深宮獨看南飛鴻隨  
兒作帝心不願惟願西朝拍梁殿茂陵少年亦可  
人遣來海島來相見金猊夜燎龍涎香明珠夜照  
光煌煌番禺蠹甸隔萬里今夕得遂雙鴛鴦白首  
相君佩銀印干戈欲起蕭牆釁莫言女子無雄心  
置酒宮中潛結陣漢家使者懦且柔纖手欲自操

霜矛孤鸞竟落老身手可憐空奮韓千秋樓船搖  
曳師四起或出桂陽下灘水越郎追斬呂嘉頭九  
郡同歸漢天子尉佗墳草幾番青闕橫玉璽初從  
真得闕却為邯鄲傾五羊江連湘浦竹嬌魂應伴  
湘妃哭

五代時僭竊

孝武廢南越置郡邑設官守歷朝至唐末交愛土豪曲  
楊矯吳相繼篡奪殆五六十載宋初丁部領篡吳太

祖封丁氏王爵

曲顥據交趾劉隱據番禺卒子襲立稱南漢顥遣子承美為勸好使至廣州以覘虛實顥死承美襲父位梁貞明元年己卯遣貢求節鉞梁因授之襲大喜偽漢大有三年九月遣驍將梁克正領兵攻之擒承美以歸克正留守交趾為楊廷藝所逐

曲承美

見上

楊廷藝愛州人也曲顥將劉龔即擒曲承美授廷藝爵

命以李進為交州使與梁克正守其城龔謂左右交趾民好亂但可羈縻而已明年廷藝果叛舉兵圍城克正潰走廷藝據其境為矯公羨所殺

矯公羨楊廷藝牙將也殺廷藝而代之晉天福二年

漢偽

大有吳權舉愛州兵圍公羨力屈乞師於劉龔龔以

十年

其子萬王洪操封為交州節度使統兵往救至白藤江權已殺公羨洪操逐之全軍陷焉

吳權愛州人廷藝牙將也殺公羨而自立子昌岌弟昌

濬繼之偽漢乾和三十二年濬稱臣於劉晟遣使入貢求節鉞晟遣給事中李璵以旌節封璵到白州昌濬使人止璵曰海賊為亂道路不通璵果不行昌濬卒弟昌文立昌文卒其佐吳處珩峰州刺史矯知護寧州刺史楊暉牙將杜景碩等爭立既而丁部領平之遂有其地

吳昌爰

吳昌濬

吳昌文

並見上

丁氏世家

丁部領交州華間洞人父公著為廷藝牙將五代末廷藝巡交州以公著權驩州刺史初吳權矯殺公羨而部領父子歸吳氏因遣公著還舊任卒部領繼襲及吳昌文卒其下作亂部領與子璉平之領交趾事號大勝王私署璉為節度使十年部領卒

璉立七年宋開寶四年辛未命大將潘美平領南璉懼

上表遣使入貢求內附太祖詔璉為節度使安南都  
護八年五月貢金帛犀角象牙香茶八月七日制封  
璉父部領為交趾郡王食實封一千戶十二月命高  
保諸為官告使太平興國二年丁璉進貢賀太宗即  
位五年璉卒弟璿立

璿尚幼嗣稱節度行軍司馬權領軍府事太平興國五  
年庚辰四月命盧龍使交趾大校黎桓擅權劫遷璿  
於別第舉族禁錮之代總其衆太宗怒興師進討桓詐



璿上表十一月遣使貢金銀器皿犀象牙寶等物管  
內將校軍耆老等以璿行節度使事襲父兄位錄其  
狀呈上時已師興奏入不報冬十一月追兵敗交趾  
於白藤江明年宋兵不利班師七年桓又詐作璿遣  
貢以師致討之故也璿為桓所害

丁氏三世  
共十七年

黎桓愛州人有志畧得志丁璉妻以兵權因篡丁氏自  
稱交州三使留後遣貢於宋表言丁璿與其母楊氏  
率吏民將校三帥推臣領府事并以璿表來上太宗

因而撫之諭以丁氏傳襲三世朕欲璿為統帥以爾副之若璿將材無取猶有童心則宜遣母子入朝必示優禮授爾以節旄凡茲二途爾宜審處其一命張宗權等往使諭旨桓已專據其地不聽命後桓上言占城國象馬數萬來寇臣擊走之太平興國八年桓遣貢金銀犀象等物宋雍熙二年桓貢金龜鶴香爐象牙白抹絹萬疋賀乾明節賜其使衣各一襲銀帶鞍勒馬五匹桓貢金銀方物十月庚申制授桓金紫光

祿大夫檢校太保使持節都督諸軍事安南都護充  
靜海軍節度交州管内觀察處置等使上柱國京兆  
郡開國侯食邑三千戶仍賜號推誠功臣命李若拙  
等充官告使端拱元年四月制桓進封開國公加食  
邑一千戶命魏庠等充官告使閏五月桓遣貢淳化  
元年制加桓進封命宋鎬等充官告使十月桓貢七  
寶裝椅子犀象等物四年三月制封桓交趾郡王命  
王世則等為官告使五年三月桓遣使貢後恃險阻

屢為寇害失藩臣禮至道元年春廣西轉運使張觀  
奏欽州如洪鎮掠居民劫廩食而去其夏桓所管蘓  
茂州兵五千寇邕州所管祿州巡檢楊文傑擊走之  
太宗志在撫寧荒服不欲問罪觀又言風聞桓為丁  
氏斥逐擁餘衆海島間未知所據故以寇鈔自給今  
桓已死觀仍上表稱賀詔太常丞陳士隆為採訪使  
按其實始知尚存而傳聞之誤二年詔劾觀尋病  
卒論斬衛昭美等於如洪鎮是夏命陳堯叟充廣西

轉運使因賜詔書仍遣李建中賁往先是欽州如洪  
咄步如昔三鎮皆濱海交州潮陽民卜文勇等殺人  
合家亡命如昔鎮將黃令德等匿之桓令潮陽鎮黃  
成雅進捕之令德不遣於是標掠而去堯叟至如昔  
鎮得藏匿之由乃盡擒獲凡男女老小百三十戶口  
潮陽吏黃成雅得其人以狀諭堯叟桓遂上章感恩  
且言已約勒溪洞不復搔動矣七月太宗復遣李若  
拙賁詔以玉帶賜桓初建中至交州桓禮甚薄因附

表起居且言劫如洪乃外境海賊爾即執蠻人不曉  
華言者二十七人送轉運使及桓表至故遣若拙往  
使始至桓出郡迎詞氣頗慢謂若拙曰昔劫如洪乃  
外境爾皇帝知否倘交州構叛則當先廣州及閩中  
諸郡豈止如洪鎮而已若拙從容答曰主上聞如洪  
被寇未能辨其虛實以足下拔自牙校授之節鉞禮  
合盡忠豈有他志始執送海賊其事甚明然大臣同  
議以為朝廷建郡以寧海表今海賊之亂交州力不

能獨制宜發精兵數萬會州軍同擊海賊俾絕後患  
帝慮交州不測朝旨或致驚駭不若專委是故不復  
會兵桓愕然曰海賊犯邊守臣之罪也聖人寬大恩  
過父母未即誅責自今願稟恭朝化肅寧瘴海因北  
望稽首稱賀三年四月制加桓兼侍中進封南平王  
以真宗即位覃恩也九月桓貢金銀七寶椅犀角象  
牙細絹詔以方物發於萬歲之殿靈坐仍許其使人  
行奠之禮是歲占城寇邊桓擊退走乃上表賀畧云

本道境接占城一二年間隣部騷動掠近鄉之稅戶  
侵邊境之馴良累發兵戈御彼捍禦致稽朝貢深負  
憲章優詔答之仍賜帶甲馬真宗咸平元年九月桓  
獻馴象四年十二月制加桓功臣四年貢馴象犀七  
寶裝金瓶謝加恩也五年十一月制加桓保節功臣  
六年三月欽州言交州城場民及頭目八州使黃慶  
集等挈其屬四百五十餘口入居州之勇步江烏土  
村詔遣使尉撫之令黃還本道黃慶集等懼罪不還



遂居欽州海崖景德元年六月桓遣其子黎明提來  
貢二十七日對於崇政殿復召於便殿勞問之即授  
黎明提金紫光祿大夫檢校太保驩州刺史上柱國  
二年正月詔上元節日賜明提鉞令與占城大食使  
觀燈宴飲是月賜黎桓應大藏經從其請也三年三  
月桓薨

龍鉞桓仲子也嗣立為弟龍廷殺之

龍廷桓幼子也殺龍鉞而自立其兄龍全忿之劫庫財

而遁護率扶蘭寨兵相爭攻立未定初黎明提入貢  
以國亂不能還駐廣州知府高驛罷給館券真宗別  
賜詔錢五十萬米一百五斛續給館券六月知廣州凌  
策言準詔以交趾兵亂令臣與沿邊安撫使邵晬同  
經度使宜以聞臣等至白州遇廣州部送州到交趾  
黃慶集等百姓千餘口具言黎桓既死諸子各集兵  
散設寨官屬離拆人民憂懼慶集等以不從驅率戮  
及親族令奔來告乞糧出兵平定交州慶集等願為

先鋒刻日攻取臣等會議若朝廷久其所請乞以廣南諸州屯兵益以荆勁卒五千水陸齊進立乞平定真宗四年黎桓既修貢亦嘗遣子入覲海陽寧謐不失忠順今聞桓死未加予恤遂伐其喪豈王者所為乃詔策等依前詔安撫務令謐靜其慶集等計口給廩食時服賜令補職冬著條例以聞當優與恩命乃令致書交州諭以朝廷威德如自相魚肉久無定位偏師問罪則黎氏無遺種矣龍護懼即奉龍廷主軍

事七月卽暉上言龍廷公牒至自稱靜海軍節度觀察處置等使檢校太尉開明主請以八月遣弟入貢臣以龍廷未授真命不敢回報帝以窮荒異域不識大體卽暉諭令削去偽官方許入貢黎明提尚駐廣州卽暉以其國事及龍廷奏報諭令削去就願歸給券賜錢遣之二十三日卽暉上邕州至交州水陸圖真宗以示近臣曰交州瘴癘若興兵攻取死傷必多且祖宗開疆廣大若此當慎守而已何必勞民動衆

貪無用之地如照臨之內有叛亂者則不得不除耳  
暕又言交州黃慶集等先避亂歸化種族稍多若復  
遣還恐遭屠戮望就賜恩秩乃授三班借職抑州監  
稅四年七月權安南靜海軍節度觀察處置留後黎  
龍廷遣弟黎明昶與掌書記黃成雅貢龍廷表乞九  
經及佛經一藏從之八月十七日制授龍廷檢校太  
尉靜海軍節度使安南都護交州郡王賜推誠功臣  
賜名至忠又贈故靜海軍節度使南平王黎桓中書

令追封南越王布帛羊酒為之賻禮制初授交州惟加節鉞未賜王爵真宗以遠俗須朝廷恩命方可鎮服特命賜之十八日授黎明昶為持節州諸軍事副使黃成雅為朝散大夫殿中丞知安南使明昶以兄降制命求赴崇政殿告謝乃召升殿帝撫問之九月鑄交趾郡王印詔廣南轉運使就賜之大中祥符元年正月制加至忠翊戴功臣九月交州王言真腊商賈二人為交州所逐遁至州境欲配隸本州真宗曰

遠方之人窮而來歸詔給時服緡錢遣使伴送歸國  
十二月制授至忠依前檢校太尉同平章事安南都  
護交趾郡王充靜海軍節度觀察處置等使二年十  
二月至忠貢金銀器馴犀方物真宗以犀遠至違性  
將還之慮逆至忠意令候使人回縱之海濱至忠表  
求甲冑金具裝從之又移牒轉運使求於邕州互市  
真宗以濱海之民數被交趾侵寇仍前止許廉州及  
如洪互市蓋為邊隅控阨之地今或直趨內地事頗

不便詔本州以制誥諭之三年三月至忠薨一子方  
十歲遂為李公蘊所篡時至忠所使猶在京師真宗  
以其狀諭之如欲服亦聽使人掩之而已

黎氏三世  
共三十年

安南志畧卷十一



欽定四庫全書

安南志畧卷十二

元 黎崱 撰

李氏世家

李公蘊交州人

或謂閩人非也

有韜畧黎至忠用為大將親信

之大中祥符三年庚戌至忠薨子幼弟明昶爭立公

蘊逐而殺之自領交州事稱安南靜海軍權留後廣

西轉運使何亮言公蘊移文言見率方物貢等請降

制宋真宗曰至忠不義而得公蘊尤而效之益可惡也即詔亮安撫邊民察軍機以聞十月制授權靜海軍留護李公蘊特進檢校太傅安南都護節度觀察處置等使交趾郡王食邑三千戶實封一千戶兼御史大夫上柱國特賜推誠順化功臣仍賜襲衣金器幣十二月公蘊遣使賀祀汾陰后土又表乞大藏經及御札八體書法從之仍賜大藏經太宗御書一百軸降詔書獎諭四年正月授安南進奉使梁任文等

以爵詔從汾陰成禮而還五月以汾陰恩制加公蘊  
同中書門下平章事五年四月公蘊遣李仁美貢金  
銀紗羅犀角象牙等物對於崇政殿仁美乞赴諸寺  
觀燒香瞻禮及觀天竺國所進獅子仍遣使臣館伴  
五月授仁美爵十一月制加公蘊開府儀同三司翊  
戴功臣賜器幣鞍勒馬七年二月已奉祀制封又加  
保節守正臣七月十日詔書交趾占城大食閣婆三  
佛齊等諸國遣使進奉所在差使臣接伴越闕郵傳

供給務令豐備時交趾入貢沿路傳舍供給鹵莽四  
年七月十日公蘊上言鶴柘蠻三萬衆於本州界至  
寨圖本道臣發人騎與戰於茅林賊衆大敗擒其主  
軍楊兵會及蠻獠人馬遣使詣闕貢馬六十疋獻捷  
召見崇德殿賜其使人冠帶器幣有差八月公蘊貢  
方物仍求賜介冑及大藏經從之十二月廣西轉運  
使高惠連上言交州寇欽州如洪寨鈔人畜甚衆詔  
惠連移牒交州遣追索之先是獠戶張婁者避罪來

奔知欽州穆重穎召之中路復拒焉都巡檢臧嗣遂令  
如洪寨犒以牛酒交州憤其事因捕獠故來寇鈔遂  
詔諸州自今不得誘召蠻獠及行宴犒以致生事天  
禧元年二月以上金號畢封公蘊為南平王加食邑  
一千戶二年五月賜公蘊道藏經從其請也三年遣  
弟鶴來貢十二月加公蘊檢校太尉乾興元年制加  
公蘊太師崇仁功臣因以仁宗即位遂及之公蘊遣  
李寬泰來賀厚賜遣還天聖二年十二月加公蘊食

邑功臣

關

三司言作坊物料庫估交州人使進納香藥價錢二千八百六十貫詔回賜五千貫示懷遠也五月廣南西路轉運言公蘊擅令子弟與女壻申承貴等領衆人本道標掠邊民累行根尋並不放還却去人口慮以後轉為邊患今欲量添差本路教閱兵士與部巡檢部領會合請溪峒壯丁以取索却去人口為名接便檢去惡黨直下本路更却勘會承貴等若委實拒

抗占留劫去人口不還即與邕州同其體量如須合  
剪除取劫去人口仰預先密切探候彼不作支吾即  
依所奏施行六年三月三日公蘊薨子德政遣使來  
告哀自領留後事

李德政舊名開天既襲父位其時廣西轉運使秦開天  
弟開國潛畜兵甲勢必爭立乞於邕欽廣惠稍益兵  
戍以備非常詔本司暫勾桂宜等州巡檢張斌領所  
部兵士就近防之候伊寧靜即依舊天聖七年四月

安南靜海軍留後事李德政言父既沒合管叅佐將士耆壽諸臣權領州鎮遣使入貢詔廣西轉運使章頻充弔祭使贈公蘊侍中追封南越王授德政官如公蘊初景祐三年交趾寇思陵等州掠馬牛焚廬舍而去詔遣問令捕首領正其罪寶元元年冬十二月封德政為南平王皇祐元年秋九月嶺南蠻儂智高寇邊交趾請出兵取討初余靖以為便宜許請於朝及狄青為大將遂奏曰假兵於外以除內寇非我利也以



智高橫殘而力不能制乃假外境兵其或因而起亂

何以禦之願罷交趾助兵五年正月詔止交趾援兵

從狄青之請也至和二年德政薨子日尊立

德政在位三十

年薨謚大王

日尊立仁宗就降封靜海軍節度交趾郡王嘉祐三年

貢異獸白麟英宗即位加同平章事神宗進封南平

郡王加開府儀同三司熙寧四年日尊薨子乾德遣

使告哀

乾德立宋加封用為交趾郡王熙寧八年冬十一月交趾寇邊陷欽廉等州命趙高及內侍李憲討之

先是知桂州沈起劉彛相繼遣官入海峒集土兵為里保甲繼命於海濱集舟師預教水戰禁止州縣與交人貿易交人疑之遂舉衆分道入寇衆號八萬圍邕州十月陷欽州王自陷廉州所破城邑必為露布揭之擢路言所部叛入中國者官吏庇匿訴於桂管不報故我師兵追捕叛者又言桂管點閱溪峒丁言

欲見代又言中國作青苗助役之法窮困生民我  
今出兵欲相急救安石怒發趙鼎為安南招討使  
總九將進討李憲燕達為副仍自草制諭之制詞  
有云天示助順既兆布新之祥人知悔亡咸懷敵  
愾之氣安石最不信洪範災異之說彗星乃推交  
趾云正月陷邕州廣西都監張守節率兵救邕州  
敗於崑崙關死之州被圍四十日知州蘇緘日夜  
行勞士卒緘以神臂弓躬殺交人不可勝計交人

欲引去會有教賊囊土附城而登者遂陷緘曰吾  
義不死賊手乃還解命其家三十六人皆先死藏  
屍於坎縱火自焚賊至求緘不得殺吏卒民丁五  
萬餘人並欽廉死者十萬人並毀其城初州受圍  
久儲糧既竭井泉皆涸飢渴飲水多病死相枕而  
民無叛志尋贈緘奉國軍節度謚忠勇賜京城甲  
第一區上田十頃官其親族七人以其子元為閤  
門祇候特召服募舟師副將賜對便殿上撫慰甚

至且言邕州若非卿父守禦如廉欽二州賊至必  
破乘勝奔走則象郡桂林皆不得保矣昔張巡許  
遠以睢陽蔽捍江淮較之卿父誠不遠矣初安石  
秉政欲立邊功於是有獻言者謂交趾已為占城  
所敗衆不滿萬亦可計日取安石乃以沈起知桂  
州起於南方妄擅招納以罪罷之安石又用劉彛  
代之彛至復生事於是交人舉寇乃竄起郢州彛  
隨州九月二日以郭達為安南招討使趙高副之

冬十一月交趾納款元豐元年秋九月交趾入貢

哲宗即位加平章事元祐中進南平王乾德在神宗

朝犯邊復歷哲徽兩朝方不犯順徽宗宣和九年加

封司空靖康初乾德尚無恙高宗紹興元年乾德薨

居位五十九

年諡仁王

陽煥仁王子也立紹興二年春三月封交趾郡王七年陽

煥薨

居位七年  
諡神王

天祚神王子也立紹興八年春三月封交趾郡王二十

五年秋七月加封南平王賜衣二襲六事御化花金帶銀匣塗金銀金器二百兩衣著二百疋鞍轡一副馬二匹天祚遣貢故有是命二十六年天祚遣子來貢秋八月加封檢校太師三十年冬十二月獻馴象高宗謂大臣曰朕不欲以異獸勞遠人可令帥臣詳諭今後不必以入貢孝宗隆興二年秋八月交趾入貢賜安南國名自此始加封南平王三年是歲天祚薨

在位三十九  
年謚英王

龍翰立

翰音

英王子也淳熙六年冬十月封安南國王

光宗紹熙五年秋八月乙卯加封恩忠功臣是冬十

二月甲子復加濟美功臣後李氏威聲不振寇盜蜂

起合圍羅城龍翰走歸化江倚何高家外戚陳昆弟

集鄉兵平其亂迎王還宮宋寧宗嘉定五年夏五月

癸酉龍翰薨宋遣使弔

居位三十年謚高  
王子吳旦嗣立

吳旦

五成切

時國威州賊沅年號金天大王與烘路人段

摩雷叛陳與弟建國擊之既克乃說摩雷和親併力



攻年反為所敗年死亂平以功為子求尚其王女昭  
聖從之吳王無後立昭聖為嗣退居真教寺學佛薨  
昭聖立一年庚寅歲以國政授子天陳凡李氏宗族與

齊氏姓李者令更為阮以絕民望

李氏傳至三世宋王稱作東都事畧

交趾附錄云黎桓劫丁氏三世而國亡公蘊纂黎氏  
數世而未殞豈非幸歟今李傳八世共二百二十餘  
年無子國歸其壻迄今  
祠祀不絕又其幸哉

安南志畧卷十二

欽定四庫全書

安南志畧卷十三

元 黎崱 撰

陳氏世家

二世陳

闕

交趾人李氏外戚也李亂末陳與弟建國

擊賊有功以為太尉建國為大將軍子尚李惠王女

昭聖因有國

卒追謚太祖  
二名諱也

闕

太祖仲子也寬仁聰慧文武兼備以李壻襲國昭聖后

無子復娶其妹生三子長仲季宋紹定初遣貢理宗  
封為安南國王加特進檢校太尉兼御史大夫上柱  
國賜效忠順化保節守義懷德歸仁慕治奉公正恭  
履信功臣靜海軍節度觀察處置等使食邑一萬一  
千戶實封四千二百戶寶祐六年上世襲表景定二  
年又遣貢仍下詔獎諭遣使賜金并法錦

大元丁巳歲十二月太師烏蘭哈達帥師自雲南經安  
南邊邑國人拒之官軍擊破俱降戊午歲改名遣陪

臣上表納款奉貢職是歲遜位於子陳道立書諭入見明年遣陪臣入闕請罪待終父喪而朝三十年上命兵部尚書梁曾等諭入見以疾辭遣其相陶子奇來貢朝廷留子奇於江陵立南行省以平章劉二巴圖等總兵屯靜江明年秋進討三十一年春正月世祖崩夏四月成宗皇帝即位詔罷兵命禮部侍郎李衍等賫詔赦罪放陪臣陶子奇還國元貞二年遣貢上表求封王爵不允乞大藏經賜之大德五年命尚

書瑪哈穆特等引其來使鄧汝林等還國諭安南依前  
三年一貢臨期自來朝廷不復遣使明年春遣黎克  
復來貢至大元年復遣貢朝廷尚書宴闕等頒武

宗皇帝即位詔使至李己先薨

居位十五年  
壽五十三

五世張道立遣使貢賀至大四年又遣貢是冬朝廷又

遣禮部尚書馬

闕

等宣仁宗皇帝即位詔使至先

率兵攻占城國擒其王皇慶壬子六月兵還迎拜詔  
書遣使貢賀上表謝罪延祐元年朝廷回賜禮物延

祐六年薨

謚英王

六世襲國延祐七年遣貢至治元年英宗皇帝即位遣使貢賀泰定元年遣吏部尚書瑪哈穆特郎中楊宗瑞賁詔往諭遣使來貢至順元年遣使貢明年朝廷遣吏部尚書森濟烏克等宣文宗皇帝即位詔明年遣使貢賀至元元年朝廷遣吏部尚書特珠等宣今上皇帝即位詔時已委國於子退而學聖朝中統六年制封陳為安南國王降虎符國印至元八年遣貢朝廷

遣使賫詔諭安南三歲一貢回賜禮物並諭入覲以

疾辭至元十四年薨

居位十八年壽六十謚太王

三世先諱世太王仲子也魁竒雅量戊午歲父老代立

遣貢於宋寶祐間理宗封為安南國王初父子臣附

天朝父薨世子不請命而自立至元十五年帝遣禮

部尚書柴椿諭入見世子以疾辭委國於子

闕

十

七年命柴椿再詔世子懼遣從叔陳遺愛代覲帝以

不庭立遺愛為安南國王十九年授柴椿行安南宣



慰使都元帥以兵千人衛送遺愛就國下諭安南宗  
國族人官吏世子不聽廢遺愛為庶人十九年復遣  
諭入見且假道進兵占城令助軍輸糧世子辭久疾  
不能入見國小無軍助二十一年冬十二月鎮南王  
大軍壓境世子舉國迎敵戰敗遂棄城遁近親陳益  
稷陳鍵陳秀峻陳文弄等降明年四月國人乘勢攻  
復羅城五月鎮南王以水潦班師二十一年上表謝  
罪朝廷留其使帝命鎮南王統師再征十二月大兵

至世子戰敗逃匿海島伺便掩擊明年三月鎮南王  
以暑濕班師世子遣子倍代謝罪貢方物二十七年  
遣貢帝命提刑按察司劉廷直等賁詔諭意明年世

子薨

居位二十一年壽  
五十一謚聖王

至元十五年以父老立後表乞詔襲帝不允二十八年  
遣禮部尚書追號大虛子允表章進貢必用名至元  
五年又遣貢

內附侯王

陳益稷太王第五子也聰俊好學其國封詔國王為大將軍掌沱江令路至元甲申冬鎮南王大兵入境其兄世子舉國拒敵敗走明年益稷挈家內附五月隨師歸北秋入覲至元丙戌春二月帝憫其忠孝特賜益稷為安南王光祿大夫給符印賜錢五萬緡長子伯懿授嘉議大夫遙鎮沱江路安撫使賜衣物弓矢鞍轡馬疋丁亥歲支給月俸冬隨師還國明年正月大兵破其國都世子遠遁官軍欲戰不得三月鎮南

王以暑濕班師安南國王隨師還鄂秋入見給衣褥  
賜錢萬緡至壬辰加授湖等處行中書省平章政事  
癸巳始遣使進表賀天壽節甲午春帥師南討會寢  
兵還居鄂夏四月成宗皇帝入見賜五萬緡大德辛  
丑又入見賜錢五萬緡賜其屬官五千緡乙巳春正  
月遣使赴都進呈白兔帝召其使至玉德殿廷慰回  
賜內幣大紫金段二疋丙午歲賜田二百頃屬官安  
撫勅王議等田二百頃丁未秋遣賴益歸黎剌進表

賀武宗皇帝即位皇太子正位東宮冬入見至大戊  
申加銀青榮祿大夫賜銀一百五十兩辛亥春三月  
仁宗皇帝即位秋進表賀皇慶壬子入見加金紫光  
祿大夫賜錢五萬緡金第一金段四延祐戊子入見  
加儀同三司延祐庚申春三月英宗皇帝即位遣使  
進表賀回賜禮物天歷戊辰文宗皇帝即位進表賀  
錫賚有加明年四月薨壽七十六葬於漢陽賀家山  
湖廣行省奏聞帝憫其忠追謚忠懿王賜錢五千緡

賻其葬王喜佛老工於詩有拱極樂吟集行於世元  
統甲戌子沱江宣撫使陳端午入見今上皇帝命襲  
父爵為安南王寵襲而還陳秀峻安南國王姪武道  
侯子其國封文紹侯更文義侯秀而文至元甲申冬  
大兵至明年春秀峻勸其父母卒歸順四月入見於  
出國道亡者八悼章三世八喪千古痛一身萬里百  
年孤九月至京師帝嘉之詔封秀峻為輔大夫公資  
善大夫給虎符賜錢五千緡子德新遥授安南府路

宣撫使嘉議大夫表弟賴益歸遙授南柵江路安撫使嘉議大夫至元乙亥各賜弓矢錢物鞍馬隨師南討明年還居漢陽鎮南王初納其妹陳氏為次妃生宗子二至元乙丑夏五月卒於粹山吟稿傳後

陳文弄國叔統國王太師陳度之孫仁誠侯悅子也本國封彰懷上侯謙恭溫粹用為大將守三帶江至元甲申冬鎮南王大兵至明年文弄挈家內附天朝授嘉議大夫遙授歸化江路宣撫使賜錢帛弓矢鞍馬

隨師征進効力有功至元辛丑入覲欽授宣命降虎符大德辛丑再覲欽授宣命陞中大夫遙授廣西道宣慰使賜錢二萬五千緡金段二大德丙午罷支其屬月糧賜田一百頃以自養皇慶壬子入見轉正奉大夫職如故明年二月卒葬於漢陽馬家湖子孫時祀不絕陳鍵太國王孫清國王子也本國封彰憲上候貌頗哲讀兵書善騎射代父領靜海軍節度娶太師昭明王女瓊徽生墨侯至元甲申因與世子子佐



天王有隙托莊老學隱居仁睦鄉是冬鎮南王大軍  
入境世子戰敗右丞索多復自占城進其后世子倉  
皇無策乃起鍵率兵拒索多力弱無援時世子存亡  
未可知鍵謂崩等曰世子被召不朝以致討危在旦  
夕執迷不悟其忍國覆家亡乎明年正月率崩等數  
萬衆獻兵器降鎮南王嘉賓襲衣鞍轡夏四月遣莽  
賚薩巴伴彰憲等入見驛馬至支凌國人晝夜圍攻  
偕伴官彰憲等破圍突出前又為被追擊輜重掠盡

彰憲謙恭雅量待下以恩人民莫不哀慕之不幸中  
道殞越不能以其事達朝廷生封死贈之典不及初  
出國時尚有母國始黎氏及親從在行間為國人殺  
獲豈勝痛哉惟其母久以世子親兄僅免

安南志畧卷十三

欽定四庫全書

安南志畧卷十四

元 黎崱 撰

學校

趙佗王南越稍以詩禮化其民西漢末錫光治交趾任  
延治九真建立學校遵仁以義漢唐時嘗貢進士明經  
者李琴張重姜公輔是也至宋安南立國李氏設科舉  
法三歲一選狀元榜眼探花即為典故給章服騶從以

榮其歸

官判

丁氏以來始受宋封王爵其國則竊稱號名倣趙佗故事自封其國有王侯設官有正有接者類品從也

王

嗣王

上侯

侯

按侯

內明字

近侍官  
加內字

明字

接明字

內大僚班

大僚班

大僚

親王班

國親  
爵名

內寄班

寄班

內諸衛

諸衛

以上文  
武相參

文內員外郎

員外郎

武內郎將

郎將

文內令書家

令書家

武內上班

上班

武內上制

上制

武內供奉

供奉

武內侍禁

侍禁

文校書郎權冕恭侯書舍

舍一作家

武內殿直

殿直

文恭侯舍人

書舍

文舍人

師翁

武借職

借職官

文都曹

兵曹

僭宰執

太師

太尉平章事

太傅

太保

輔國

少師

少保

少傅

左右僕

參知政事

武帥

都元帥

節度使

大將軍

副元帥

副節度

副將軍

以上族  
宗為之

內殿前指揮校

招討使

偏將

裨將

文職

御史臺官

翰林院官

檢法官

安撫使



尚書

東上閣門使

安撫副使

三司院官

一宣清二肅憲  
三刑政乃問訟所

安撫司官人

近侍官

入內判首候

管近侍官

上品候

上品明字

上品大僚官班

上品奉御

中品奉御

下品奉御

侍衛人化頭

侍衛人勇首

侍衛人

分權官

太師太尉衙都官

乃其輔也明字

為之

王侯衙行遣

決衛內侍

王侯衙管甲

行遣類也又一文一武各有所管

方鎮

上路寨主

侯明字為之

副寨主

俗呼行遣又呼尚書明字大僚為之

知州

觀察

察海

押獄官

鎮遏

世襲鄉邑官

管甲

上中下三等大僚  
諸衛郎將為之

大撮

小撮

主都

泮宮

學官用下第舉子  
主之教養生員

僧官

國師

僧統

僧錄

僧正

大賢官

道官

道錄

威儀

都官

章服

黻黼粉米華蟲組綬垂佩  
方心曲領冕旒稍類中州

國王之冠曰平天冠卷雲冠芙蓉冠服袞衣全龍帶領  
掛白羅蹙錦嵌金珠方心曲領手執圭九節禮受臣拜  
賀王冠三級侯冠二級明字冠一級名拱宸冠上綴金

蜂蝶大小踈密有差親王著銷金紫服侯明字著鳳魚  
綉服大僚班而下袞冕各有級等

文班加  
金魚

員外郎郎將

戴金銀問道冕令書舍至校書郎上制侍禁皆戴銀冕  
冕大禮則用之常禮止幘頭紫服如恭侯書舍翁類也

帶或犀或金各依品等象牙笏同職官借職等幘頭紫  
服角帶無笏又手拜國主平居戴唐巾常服貴白國人

著白者為僭制惟婦女不禁其裝飾王侯及庶民常著  
團領元裳白羅紈綉鞋尚革王侯私謁國主不巾示其

親貴庶民並不得侍近內官上品戴揚棠冠綴金蜂蝶  
踈密不同著服中品冠服製色稍減下品素揚棠冠紫  
服皆又手拜無笏上品常戴之巾以紫絨間碧為六鬚  
綴巾後橫帶示其貴也中品紫鬚下品皂鬚環以紫磨  
金玳瑁為之異矣

刑政

法謀反者戮親族殺人者償命捕奸者得自專殺近代  
始令奸夫以錢三百貫贖死罪淫婦斷歸其夫為婢許

自典賣殺有官者驗高卑償錢贖罪仍杖皆八十重者杖六十殺與奸同例詈有官者量輕重令犯人出錢拜牛酒為謝杖如之前同類鬪傷罪先毆者偽造非法者以罪名黥其面杖而遠徙強盜者斬竊盜者絞犯皆杖八十黥犯盜二字元盜之物一償九分不能償者沒其妻孥再犯者刖其手足三犯殺之誣告者反罪公田則以歲入民歲例納身役錢及賀正月七月節料魚米參用

農商不徵稅糧

地狹人衆前世建此法以寬民賦

官吏廉明能決訟者考功遷官

度量權衡與中國同惟金銀段疋絲枲藥物諸貨

開

計

而已交易用唐宋時錢七十文為一伯七伯文為一貫

逋負者得自禁錮盡歸本息始釋窮民不能自給者許典贖於人

兵制

軍無定籍選民丁壯者為之五人為伍十五為都又推



健役者二掌習武藝調則出暇則歸農

親軍

聖翊都

神翊都

龍翊都

虎翊都

並文項

奉衛官職都

職主捕錄同罪  
以上皆有左右

游軍

鐵林都

鐵艦都

雄虎都

武安都

王侯家僮

全侯都

躍童都

山獠都

餘不載

歷世遣使

趙氏遣使

漢高帝時南越趙佗使其內史潘中尉高御史平輩上書謝罪皆不返佗乃僭號子孫仍之

元鼎中南越為內地署官府任歷朝弗變

五代亂變  
交趾丁部

領即據  
其地

丁氏遣使

宋初丁部領遣貢太祖封部領為交趾郡王宋開寶年  
丁璉襲父位遣鄭琇王紹祚江巨瑄貢金帛犀象

黎氏遣使

宋太平興國五年黎桓篡丁氏遣趙子愛張紹憑貢方  
物太宗封桓為交趾郡王

宋景德元年黎桓遣子黎明提入貢召至便殿勞問之

授明提爵三年三月桓卒子龍庭立遣弟黎明晁與掌書記黃成雅來貢召升殿撫問久之封龍庭以王爵賜名至忠授明晁等職名

李氏遣使

宋大中祥符三年李公蘊篡黎氏真宗封為交趾郡王公蘊遣陪臣梁文任黎再嚴來貢授任文等爵命五年遣李仁美陶慶文陶碩吳懷嗣來貢俱授以官天禧三年公蘊遣弟李鶴入貢乾興元年又遣李寬泰

阮守強來貢賀仁宗即位天聖二年優詔回賜公蘊  
錢物示懷遠也

陳氏遣使

大元丁巳冬大師烏蘭哈達兵至南安陳太王遣使陪  
臣院李士表貢方物中統二年己酉陳太王遣大夫  
阮深阮演來貢四年癸亥遣殿前范巨地陳喬來貢  
象優詔令安南三歲貢

至元三年丙寅遣大夫楊安養武桓貢

至元戊辰歲遣大夫范崖周覽貢

至元庚午遣大夫黎佗丁拱垣貢

至元辛未遣大夫馮莊阮元貢

至元壬申遣大夫童子野杜木貢

至元乙亥遣大夫黎克復黎文梓貢會大兵平宋明年  
克復等由湖廣還國

至元十四年丁丑陳太王薨子立遣大夫周仲彥吳德  
劬來貢明年世祖皇帝命禮部尚書柴椿召世子入

見以疾不行遣其大夫鄭廷瓚杜國計入貢留廷瓚  
於京師

至元庚辰再命柴尚書引杜國計還諭旨世子懼遣其  
從叔陳遺愛代入覲黎仲佗副之十九年壬午世子  
遣大夫黎努鄧右點來貢

至元癸未遣大夫阮道學來貢

至元壬午間右丞索多征占城甲申冬朝廷遣使諭世  
子假道進兵俾助兵輸糧世子懼遣大夫陳謙甫陳

均赴荆湖占城行省求緩師不允復遣段晏黎貴入貢大兵既發留晏等於京師繼遣阮文翰乞止師是冬鎮南王大兵臨境以文翰導前破內傍開喜釋文翰還諭其主早附弗聽久乃誘宗子文義侯陳秀峻挈家歸順明年朝廷授文翰中順大夫遙授歸化江路宣撫使至元乙酉正月官兵下羅城世子遣宗人忠憲侯陳湯大夫阮銳副之來請和即留軍中五月鎮南王以暑潦班師將銳北歸銳逃伏草澤卒伍獲



斬之

至元丙戌遣大夫阮義全阮德榮貢朝廷以世子不朝  
留義全於京師

至元丁亥遣大夫阮文彥白舍來貢會王師再舉留文  
彥等數年放還國

至元戊子春鎮南王班師世子遣近侍官朱修改可容  
貢方物謝罪

至元己丑遣大夫譚衆來貢明年世子歿

至元辛卯世子遣大夫嚴仲維陳子長貢

至元壬辰世子遣令公阮代之中散何維嚴來貢

至元癸巳遣其相陶子奇大夫梁文藻來貢朝廷以被

召不朝留子奇於江陵立南行省討之明年成宗皇

帝即位赦世子罪釋子奇還國

元貞元年乙未遣大夫阮孟憲陳克用貢

大德元年丁酉遣大夫阮文籍范葛貢

大德戊辰遣大夫鄧不文武不軌貢

大德庚子遣大夫鄧汝霖阮必來貢

大德壬寅遣其相黎克復大夫陶永貢

大德甲辰遣大夫阮若拙蘓欣貢

大德丙午遣大夫費木鐸黎元宗貢

至大元年戊申遣大夫阮克遵范敬資貢賀成宗即位

俊薨子立

至大乙酉世子遣大夫童應詔謝大董來貢

至大乙亥遣大夫黎仁傑武子班貢

皇慶二年遣大夫阮文琰黎時髦貢賀仁宗皇帝即位

延祐元年甲寅遣大夫鄧國用吳元老貢

延祐丁巳遣大夫尹世村丁觀貢

延祐庚申薨世子遣陪臣鄧恭儉杜士遜來貢

泰定二年乙酉遣大夫黎老吾阮維翰貢

至治元年辛酉陳遣大夫莫節夫賴惟舊貢

天歷元年戊辰遣大夫阮處樂譚吾少貢

至順元年庚午遣大夫段子來黎克遜貢

至順壬申遣大夫鄧世延貢賀文宗皇帝即位

元統三年甲戌改至元元年遣大夫童和卿阮固夫貢

賀今上皇帝即位

至元丁丑遣大夫潘公直阮必炤貢

至元己卯遣大夫陳國寶貢



安南志畧卷十四